

SANCTISSIMI DOMINI NOSTRI

LEONIS

DIVINA PROVIDENTIA

PAPAE XII.

LITERAE APOSTOLICAE

QUIBUS FACULTATES PRO ANNO JUBILAEI CONCEDEUNTUR
POENITENTIARIIS IN BASILICIS, ET ECCLESIIS URBIS
PER CARDINALEM MAJOREM POENITENTIARIUM DEPUTATIS,
ET CONFESSARIIS A CARDINALI
URBIS VICARIO DESIGNANDIS.



ROMÆ MDCCCXXIV

Ex Typographia Rev. Camerae Apostolicae

LEO EPISCOPUS

SERVUS SERVORUM DEI

Ad perpetuam rei memoriam

Annum auspiciatissimum magni Jubilæi, quem pia Christiani Populi vota præstolabantur, ex Divina liberalitatis dono læti nuper denunciavimus, datis in eam rem Apostolicis Literis VIII. Kal. Junii. Confidimus profecto, dante Deo voci Nostræ vocem virtutis, Nostrasque sollicitudines obsecundantibus Carissimis in Christo Filiis Nostris Catholicis Principibus, et in eundem finem connitentibus Venerabilibus Fratribus Ecclesiarum Antistitibus, convoluturos undique filios Israel in Civitatem Sion, in qua coelestium thesaurorum dona sibi ex Apostolicæ Sedis benignitate patere intellexerunt.

Nos quidem de tanto bonorum cumulo in eos elargiendo impense solliciti, ad ea comparanda, quibus et foveatur religio, et divini cultus majestas commendetur, et opportuna adventantium commoda præsto sint, curas jampridem pro temporum, quæ nati sumus, ratione convertimus, nullumque charitatis officium patiemur ab humilitate Nostra desiderari.

Cum vero illud præcipue acceptabili hoc tempore expetatur, ut qui gravioribus criminibus se dedere, atque ecclesiasticis censuris, aliisque conscientiae anxietatibus obstringuntur adeant cum fiducia thronum gratiæ, et disrupta demum vincula sua conspicientes sacrificent Deo hostiam laudis; in id etiam animum appulimus, ut pro commissa Nobis divini-

tus suprema ligandi, atque solvendi potestate, prompta, ac faciliora remedia habeantur.

Hoc proinde consilio Prædecessorum Nostrorum exempla ob oculos habentes, nedum in alma Urbe Nostra augendum Confessariorum numerum, sed et ampliores iisdem facultates adtribuendas censuimus, ut quolibet abjecto difficultatis timore, certaquæ spe veniæ sustentati fidentius omnes vulnera animarum aperiant, et sanitati reddantur, ac paci.

Cupientes autem gravissimam hanc pastoralis dispensationis partem certa, rectaque ratione procurari, nec ullum, quoad ejus fieri poterit, circa facultatum præsertim limites, earumque usum dubitationi, aut errori locum relinqui, Constitutioni felicis recordationis Benedicti XIV. quæ incipit = *Convocatis* = pro Jubilæo pariter editæ, in qua de facultatum id genus intelligentia, atque usu omnia perspicue, absoluteque tradita perleguntur, decrevimus inhærere; nostro idcirco motu proprio, certaquæ scientia, ac de Apostolicæ potestatis plenitudine, rem hanc universam ad eum, quem hisce nostris literis edicimus, modum ordinandam, atque dirigendam mandamus.

- I. Quare Venerabili Fratri nostro Cardinali Majori Pœnitentiarario per præsentem committimus, ac demandamus, ut juxta memorati Benedicti XIV. Constitutionem, cujus initium = *In Apostolicæ Pœnitentiariæ officio* = præter consuetos trium Basilicarum S. Joannis Lateranensis, S. Petri in Vaticano, et S. Mariæ Majoris Pœnitentiararios minores pro Basilica etiam S. Pauli via Ostiensi præsentis Anno Sancto similes Pœnitentiararios designet, nec non alios insuper a se jam electos, vel eligendos tam in memoratis quatuor Basilicis, quam in reliquis quoque sive Sæcularium, sive Regularium, ac præsertim quoad fieri poterit in variarum Nationum Urbis Ecclesiis novos similiter Pœnitentiararios deputet, et extra ordinem abunde multiplicet.

- II. Porro hisce Pœnitentiariis sive in quatuor Basilicis, sive in aliis Urbis Ecclesiis per Cardinalem Majorem Pœnitentiarium, ut præfertur, deputatis, vel per Anni Sancti cursum deputandis subsequentes facultates pro hoc dumtaxat Anno Sancto duraturas de Apostolicæ potestatis plenitudine concedimus, et impertimur, videlicet
- III. Absolvere possint per se ipsos tantum, et in foro dumtaxat conscientiæ quascumque personas sibi confitentes etiam Regulares, cujuscumque sint Ordinis, Congregationis, et Instituti; etiamsi ex præscripto Superiorum, vel suarum Constitutionum etiam a Sede Apostolica approbatarum, vel alias ex indulto, decreto, aut præcepto Apostolico extra propriam Religionem peccata sua confiteri prohibeantur, a quibuscumque sententiis excommunicationis, aliisque Ecclesiasticis Censuris etiam Summo Pontifici, et Sedi Apostolicæ quomodolibet etiam in Bulla Cœnæ reservatis, et a Saceris Canonibus fulminatis, nec non ab omnibus peccatis, et excessibus quantumcumque gravibus, et enormibus, etiam Sedi Apostolicæ reservatis: injunctis tamen salutaribus pœnitentiis, et aliis de jure iisdem Pœnitentibus injungendis.
- IV. Absolvere item possint a supradictis Censuris in jure latis, etiam Sedi Apostolicæ reservatis, quamvis publicæ in partibus sint, quamvis deductæ, aut nominatim declaratæ, ac denunciatæ in iisdem partibus sint per Locorum Ordinarios, aut alios quoscumque Judices, præmonitis tamen pœnitentibus de libello, ut infra, in his casibus publicis omnino conficiendo. Post absolutionem nimirum conficiant libellum supplicem expresso nomine, cognomine, ac Diœcesi Pœnitentis, et casu hujusmodi Censuræ publicæ subjecto, et subtus scribant testimonium absolutionis ab eadem censura concessæ, eundemque Pœnitentem dirigant ad Officium Pœnitentiariæ Apostolicæ, ut recipere

possint Breve in forma *missi*, vel *remissi* absoluti; juxta praxim ejusdem Officii Pœnitentiariæ.

V. A Censura ab homine, seu a quocunque Judice de partibus nominatim lata absolvere valeant ad effectum dumtaxat Indulgentias præsentis Jubilæi consequendi ita ut semel ac consecuti Jubilæum fuerint, eadem, quia antea, censura adstricti remaneant, ac teneantur parere Sententiæ Judicis, et absolutionem ab eodem petere, perinde ac si nunquam absoluti fuissent. Atque his Pœnitentibus nullum detur testimonium absolutionis, neque Confessionis.

VI. Absolvere insuper valeant pro foro conscientię tantum a Censuris propter hæresim formalem externam incursis (dummodo tamen Pœnitens non fuerit publice dogmatizans) previa coram ipso Confessario abjuratone hæresis secreta.

VII. Absolvere possint pro foro conscientię a Censuris eos, qui nomen dederint sectis ab Apostolica Sede etiam nuper damnatis, servatis tamen iis, quæ in Apostolicis Constitutionibus præscribuntur.

VIII. Omnia, et singula simplicia vota etiam Sedi Apostolicæ reservata etiam jurata commutare dispensando in alia pia opera.

IX. Votum tamen perpetuæ castitatis ita commutare possint ob periculum incontinentiæ, et quidem tantummodo ad effectum nubendi, monendo pœnitentes, facturos ipsos contra idem votum, si extra usum matrimonialem delinquant; remansuros proinde eodem prorsus, ac antea, voto castitatis obstrictos, si conjugii s pervixerint.

X. Votum etiam Religionis commutare dispensando possint ad effectum nubendi ob prædictum periculum incontinentiæ, ad effectum vero vitam tantum cælibem in sæculo ducendi, si Pœnitentes onera Religionis sufferre se posse rationabiliter diffidant, vel si dote sufficienti ad ingrediendam Religionem careant.

- XI.** Meminerint vero, sibi abstinendum ab eorum votorum commutatione, in quibus agitur de præjudicio Tertii. Quare in eo, quod pertinet ad vota, quamvis simplicia, seu perseverantiæ, seu alia emitti solita in aliqua Congregatione, vel Communitate, ac vota obligatoria a Tertio acceptata non se ingerant. Abstineant pariter a commutatione voti de non ludendo, præsertim quoad Personas Ecclesiasticas seu Sæculares, seu Regulares: quoad alios vero si forte attenda Personarum conditione, et circumstantiis, justa ratio pro commutatione afferatur, non aliter in casu ipsam concedant, quam excepto ludo alias quomodocumque prohibito, et iis præterea conditionibus præscriptis, unde ludus ex commutatione permissus honeste fiat. Nec dissimiliter se gerant circa vota pœnalia, seu præservativa a peccatis, ne detur ansa peccandi liberius. Quod si fortasse ejusmodi circumstantiæ occurrant, quæ aliquam commutationem merito exposcant, non aliam certe concedant, quam quæ non minus a peccato committendo refrenet, quam prior voti materia.
- XII.** Dispensare possint super irregularitate ob hæresim, sed ad exercendos tantum Ordines: item super irregularitate ob violationem Censurarum contracta, et occulta remanente cum Sacerdotibus, aut in Sacris constitutis tam Sæcularibus, quam Regularibus.
- XIII** Cum illis, qui scienter, vel ignoranter cum impedimento gradus secundi, et tertii, vel tertii solius, aut tertii, et quarti, vel quarti solius consanguinitatis, vel affinitatis etiam ex copula licita provenientes, matrimonium jam contraxerunt, dummodo hujusmodi impedimentum occultum remaneat, dispensare pro foro tantum conscientiæ possint ad remanendum in Matrimonio.
- XIV.** Cum illis, qui ab Apostolica Sede dispensationem obtinuerunt super aliquo impedimento publico, quod tamen non sit primus, et secundus tantum gradus,

vel secundus tantum gradus consanguinitatis ; vel affinitatis ex copula licita provenientis , et in precibus , vel prae verecundia copulam inter eos sequutam tacuerunt , vel falso copulam asseruerunt (dummodo nullitas praedictae dispensationis ex hujusmodi reticentia , vel assertione respective proveniens occulta sit) dispensare pro foro tantum conscientiae valeant tam ad remanendum in matrimonio jam contracto , quam ad illud contrahendum , si nondum sit contractum.

XV. Dispensare , seu revalidare Literas Apostolicas super aliquo ex impedimentis obtentas , quae irritae , ac nulle redditae fuerint ex incestu sive post petitam dispensationem , sive post illius expeditionem , et ante respectivam executionem patrato , ac iterato etiam usque ad eandem executionem , dummodo sit in casibus occultis , sive agatur de matrimonio contrahendo , sive de jam contracto injuncta semper congrua poenitentia salutari.

XVI. Similiter pro foro conscientiae tantum dispensare valeant super impedimento dirimente occulto tam primi , et secundi , quam primi tantum , aut secundi tantum gradus affinitatis ex copula illicita provenientis in matrimonio contracto , ac etiam dummodo causae graves , et quae canonice sufficientes habentur , intersint , in contrahendo : ita tamen ut si hujusmodi affinitas proveniat ex copula cum matre desponsatae , vel desponsandae , hujus nativitas copulam antecesserit , et non aliter.

XVII. Dispensare similiter pro eodem Foro tam de contracto , quam de contrahendo possint super impedimento cognationis spiritualis , itemque super occulto impedimento criminis , neutro tamen machinante , idest quando solum concurrant adulterium , et fides data de matrimonio contrahendo post conjugis mortem.

XVIII. Hisce vero in casibus matrimonialium dispensationum possint etiam quaecumque opus fuerit , pro

foro conscientiae legitimare prolem, non tamen ex adulterio susceptam.

XIX. Dispensare ad petendum debitum possint in casu affinitatis incestuosæ matrimonio supervenientis.

XX. Ad petendum pariter debitum cum illis, qui voto simplici castitatis obstricti, matrimonium contraxerunt, dispensare valeant, illos monendo facturos contra id votum, si extra usum matrimonialem delinquant, ac remansuros eodem prorsus, ac antea, voto obstrictos, si conjugii supervixerint.

XXI. Super visitatione quatuor Basilicarum cum Exteris, qui vel ob paupertatem, vel ob aliam urgentem causam in Urbe remanere non possunt, dispensare valeant vel reducendo ad tres saltem dies visitationes earumdem Basilicarum, alioquin per quindecim dies ab iisdem visitandarum, vel visitationes præscriptas in alia pia opera pro sui arbitrio prudenti commutando.

XXII. Cum civibus autem, et incolis Romanis, qui morbo, vel aliquo legitimo impedimento detenti non valeant memoratas Basilicas visitare, possint præscriptas iisdem per triginta dies visitationes in alia pia opera, quæ illorum possibilitati proportionata esse viderint, dispensando commutare: suam tamen conscientiam oneraturi, si super hujusmodi visitationibus inconsulto, et sine justa, et rationabili causa sive cum Exteris, sive cum Romanis civibus, aut incolis dispensaverint.

XXIII. Ceterum alias facultates prædictis trium Basilicarum Pœnitentiariis minoribus pridem concessas, aut forsitan concedendas per Cardinalem Majorem Pœnitentiarium in vim generalium facultatum, quibus ex Benedicti XIV. Constitutione = *Pastor bonus* = vel alias ab Sancta Sede, et a Nobis ipsis est instructus, salvas, et firmas hoc ipso Jubilæi anno esse, et fore, atque ab iis hoc etiam anno durante non

secus, ac alio quovis tempore erga omnes exerceri juxta ejusdem Constitutionis aliarumque respective concessionum tenorem debere, et licite posse, decernimus, et declaramus.

XXIV. Eisdem vero facultates, tam in memorata Benedicti XIV. Constitutione = *Pastor bonus* = et alias etiam ab Apostolica Sede, vel a Nobis ipsis Cardinali Majori Pœnitentiario tributas, quam in præsentibus nostris Literis expressas, atque contentas, prædicto Majori Pœnitentiariorum, et Apostolicæ Pœnitentiariæ Officio confirmamus, et respective, quatenus opus sit, pro hoc Anno Sancto concedimus, et impertimur ad hoc ut ipse Major Pœnitentiarius iis omnibus, et singulis tam per se ipsum, quam per alios quoscunque a se eligendos Confessarios in Urbe uti licite valeat. Si quos autem casus ad ipsum Pœnitentiariæ Officium, vel ad aliquem ex dictis Pœnitentiariis, seu Confessariis deferri contingat, qui sub præsentium Literarum dispositione comprehensi non dignoscantur, vel etiam in iisdem sint excepti; onus erit præfati Majoris Pœnitentiariorum, ad quem Pœnitentiariorum minores, et Confessarii prædicti recursum habebunt, Apostolatum Nostrum super illis consulere: Nos enim eidem præscribere non ommitemus, quidquid opportunum in Domino judicabimus, ut animarum vulneribus sanandis idonea remedia aptentur.

XXV. Cum autem ad majora animarum lucra Anno hoc salutaris expiationis comparanda, in duplicandos adhuc esse operarios pro excrescentis messis copia dignoscamus, vestigiis insistentes Prædecessorum Nostrorum, committimus Dilecto Filio Nostro Cardinali in Urbe, ejusque Districti Vicario in Spiritualibus Generali, ut ex Confessariis tam Sæcularibus, quam Regularibus ab se alias ad audiendas confessiones approbatis, seu approbandis quamplures, vel, si id

satiùs censuerit, omnes etià designet, qui facultates infra descriptas per Anni Sancti decursum exercere libere possint, ut in implendo sanctissimo ministerio utilius adlaborent.

XXVI. Quare iidem Confessarii absolvere possint per se ipsos tantum, et in foro dumtaxat conscientie personas sibi cōfidentes, exceptis Regularibus extraneum Ordinem confiteri prohibitis, a quibuscumque Ecclesiasticis censuris etià Summo Pontifici, et Sedi Apostolicæ, etià in Bulla Cœnæ reservatis, et a Sacris canonibus fulminatis, dummodo tamen huiusmodi Censuræ non sint publicæ, necnon ab omnibus peccatis, excessibus quantumlibet gravibus etià Sedi Apostolicæ reservatis, injunctis tamen salutaribus pœnitentiis, et aliis de jure iisdem Pœnitentibus injungendis.

XXVII. Omnia, et singula simplicia vota etià jurata, etià Sedi Apostolicæ reservata, exceptis castitatis, Religionis, a iisque superius N.º XI. memoratis votis, commutare in alia pia opera valeant.

XXVIII. Dispensare possint circa visitationes præscriptas quatuor Basilicarum, easque commutare eodem omnino modo ac conceditur Pœnitentiariis Nn XXI., et XXII. Præter hanc autem facultatem dispensandi circa prædictas visitationes sciant, nullam aliam dispensandi cum quoquam facultatem sibi concedi.

XXIX. Hisce autem amplioribus facultatibus per præsertes Litteras ex Apostolicæ benignitatis indulgentia adtributis, intelligant omnes tam Pœnitentarii minores, quam Confessarii ceteri iisdem respective muniendi, uti se non posse, nisi cum iis pœnitentibus, qui præsens Jubilæum consequi sincere, et serio volunt, atque ex hoc animo ipsum lucrandi, et reliqua opera ad id lucrandum necessaria adimplendi, ad Confessionem apud ipsos peragendam accedunt: neque item

posse iisdem uti cum iis Pœnitentibus, qui hujus
Anni Sancti Jubilæum semel jam lucrati fuissent.

XXX. Præterea Regularium quoque commoditati uberius
consulere, simulque augendo numero Confessariorum
pro Jubilæi consuetudine prospicere volentes, præ-
missas nuper facultates, quas Confessariis a Cardinali
Vicario designandis hoc anno competere statuimus
Nn. XXVI XXVII. XXVIII. easdem omnes, et sin-
gulas pari modo pro eodem anno tribuimus, et con-
cedimus omnibus Confessariis illis Regularibus cujus-
cumque Ordinis, Congregationis, et Instituti, qui
alias ejusdem Cardinalis Vicarii, seu ipsius Vicesge-
rentis approbationem ad audiendas confessiones ha-
beant, et insuper per suos respective Regulares Præ-
latos, seu Superiores ad excipiendas suorum Religio-
sorum confessiones deputati fuerint: ad hoc scilicet,
ut iidem Confessarii facultates hujusmodi erga solos
proprii respective Ordinis Pœnitentes Religiosos hoc
Jubilæum lucrari volentes exercere in suis quique
Cœnobiis, seu domibus libere, et licite valeant: qui-
bus etiam Regularibus Confessariis facultatem dispen-
sandi cum iisdem Religiosis pœnitentibus in Sacris
Ordinibus constitutis super irregularitate ob censura-
rum violationem contracta, dummodò occulta sit,
tenore præsentium, ac dicto anno, dictaque occa-
sione dumtaxat, atque sub conditione superius N.º XII.
assignata, concedimus, et impertimur.

XXXI. Nostræ itidem charitatis sollicitudines ad eos con-
vertemus, qui legitima causa præpediuntur, quomi-
nus decretas quatuor Basilicarum visitationes exequan-
tur, quales sunt præsertim Moniales, aliæque Virgi-
nes, seu mulieres in perpetua clausura viventes,
vel oblatæ, aliæque in Religiosis, aut Piis Domibus,
seu Conservatoriis degentes, nec non carceribus, seu
custodiis detenti, et morbis affecti: aliis quippe no-
stris peculiaribus Litteris statuemus, quæ in Domino

magis expedire videbuntur, ut et ipsi præmissarum absolutionum, ac plenarii Jubilæi participes effici valeant.

XXXII Cum vero de recto peculiarium hujus generis facultatum usu saluberrima monita prælaudatus Prædecessor Noster felicis Recordationis Benedictus XIV. pro ea, qua præstabat, sacrarum rerum peritia memoratis suis Litteris, quarum initium = *Convocatis* = proposuerit, ea iterum edi separatim, mandavimus, ut qui Fidelium animabus per Pœnitentiæ Sacramentum adjuvandis præficiuntur, habeant inde regulam luculentissimam, ad quam in perdifficili procuratiene consilia, ac judicia sua religiose componant. Omnibus idcirco Confessariis, qui præstitutis facultatibus uti velint, eadem perlegere, ac commentari diligenter edicimus, ne in gravissima actione quidpiam a recto alienum ob rerum ignorationem sibi vel invitis excidisse non sine acerbo animi dolore aliquando nanciscantur.

XXXIII. Cunctos interim Sacrorum Administres, quibus hoc salutis officium committi contingat, paterno affectu admonemus, ut ad divinum dimittendi peccata ministerium honorati, eodem rite, et, quibus par est, religionis, charitatis, prudentiæ studiis perfungantur: cumque Ecclesiæ filios ingenuiscamus ex errorum invalescentium colluvie circumferri omni vento doctrinæ, id in primis enitentur, ut cunctos doceant vias Domini, et a sapientia propellant, quæ secundum Deum non est. Æquo autem animo, atque ad patientiam comparato excipiant universos, exemplo illius confirmati, cujus personam gerere sibi datum est. Fiet hoc pacto, ut Pœnitescentes cum sibi viscera misericordiæ, cœlestesque thesauros undique reserari conspiciant, alacriores convertantur ad Dominum, ac per Pœnitentiæ Sacramentum sese eidem reconciliare satagant sollicitè.

Præsentes vero Litteras, omnesque, et singulas concessioniones limitationes, monita, declarationes, ac voluntatis Nostræ significationes in iis contentas de nullo defectu impugnari, et redargui posse; sed omnimoda firmitate validas esse, et censi, et ab iis omnibus, ad quos pertinet, exactissime observari, eisque etiam, quorum favorem respective concernunt, plenissime suffragari volumus, atque decernimus. Non obstantibus præmissis Nostris, aliisque Apostolicis, seu in Universalibus, Provincialibus, aut Synodalibus Conciliis editis Constitutionibus, et Ordinationibus, nec non quarumcumque Personarum, aut Ordinum etiam Mendicantium, Congregationum, Societatum, et Institutorum etiam specialem, et individuum mentionem promerentium etiam iuramento, confirmatione Apostolica, vel quavis firmitate alia roboratis statutis, legibus, usibus, et consuetudinibus etiam immemorabilibus, Indultis quoque, et Privilegiis etiam Mari Magno, seu Bulla Aurea, aut aliter nuncupatis, et sub quibuscumque tenoribus, et formis; et quibusvis etiam suspensionum et derogatoriarum derogatoriis, aliisque efficacioribus clausulis, seu irritantibus Decretis etiam simili votu, scientia, et potestatis plenitudine, et alias quomodolibet concessis, et iteratis vicibus confirmatis, et innovatis. Quibus omnibus, et singulis, quatenus præsentibus in aliquo adversari dignoscantur, illis alias in suo robore permansuris, pro hac vice dumtaxat amplissime, et latissime, ac specialiter, et expresse, velut si eorum tenores præsentibus per extensum inserti forent, derogamus, et derogatum censi volumus, et decernimus.

Nulli ergo omnino hominum liceat paginam hanc Nostrarum concessionum, limitationum, monitorum, declarationum, mandatorum, decretorum, et voluntatis infringere, vel ei ausu temerario contraire. Si quis

(15)

autem hoc attentare præsumpserit , indignationem Omnipotentis Dei , ac Beatorum Petri , et Pauli Apostolorum ejus se noverit incursum.

Datum Romæ apud Sanctum Petrum Anno Incarnationis Dominicæ Millesimo Octingesimo vigesimo quarto ; duodecimo Kalendas Novembris ; Pontificatus Nostri Anno secundo.

B. CARD. PRO-DATARIUS

J. CARD. ALBANUS

V I S A

De Curia . D. TESTA

Loco ✕ Plumb

V. Cugnonius

Registrata in Secretaria Brevis.